

COMISIÓN INFORMATIVA DE COOPERACIÓN, INFRAESTRUTURAS E MEDIO RURAL

ACTA da mencionada comisión informativa, correspondente ao día **20 de outubro de 2021**

Ás 18.00 horas do día 20 de outubro de 2021, reúnese a comisión informativa de Cooperación, Infraestruturas e Medio Rural, no salón de sesións da Deputación Provincial, coa asistencia dos seguintes deputados e deputadas:

Presidente: D. Pablo Pérez Pérez

Deputados/as do Grupo Popular:

D.^a Ana Patricia Torres Madureira

D. Álvaro José Fernández Pérez

D. Miguel Antonio Cid Álvarez

D.^a Consuelo Vispo Seara

Deputados/as do Grupo Socialista:

D. Aurentino Alonso Araújo

D.^a Elvira Lama Fernández

D.^a Rosario Rodríguez Delgado

Deputado de Democracia Ourensana: D. Armando Ojea Bouzo

Deputado do BNG: D. Bernardo Varela López

Deputada non adscrita: D.^a Montserrat Lama Nóvoa

Deputado non adscrito: D. José Miguel Caride Domínguez

Secretario: D. Juan Marquina Fuentes

Interventor: D. José Mosquera Casero

Non asiste o deputado do Grupo Popular don Jorge Pumar Tesouro, que é substituído por dona Consuelo Vispo Seara.

Seguidamente, iniciouse o tratamento dos asuntos incluídos na orde do día, do xeito que se reflicte a continuación:

1º.- APROBACIÓN DA ACTA DA SESIÓN ANTERIOR, CORRESPONDENTE Á ORDINARIA DO DÍA 15 DE SETEMBRO DE 2021.-

Pola Secretaría Xeral deuse traslado do borrador da acta anterior, correspondente á ordinaria do día 15 de setembro de 2021.

Non se producen intervencións e por unanimidade a comisión adopta o seguinte acordo:

Aprobar a acta da sesión ordinaria da Comisión Informativa de Cooperación, Infraestruturas e Medio Rural do día 15 de setembro 2021, conforme co borrador elaborado pola Secretaría Xeral.

2º.- DACIÓN DE CONTA DO ACORDO DE EXPROPIACIÓN FORZOSA PARA A EXECUCIÓN DAS OBRAS DE “URBANIZACIÓN DE PARCELA CON DESTINO A FUTURO CENTRO DE SAÚDE”, INCLUÍDAS NO PLAN PROVINCIAL DE COOPERACIÓN ÁS OBRAS E SERVIZOS DE COMPETENCIA MUNICIPAL CO NÚMERO 192, APROBADO DEFINITIVAMENTE O 29 DE XANEIRO DE 2021 (BOP N° 33, DE 10 DE FEBREIRO DE 2021), NO TERMO MUNICIPAL DE BOBORÁS

Dáse conta do acordo da Xunta de Goberno do 4 de outubro de 2021 de expropiación forzosa para a execución das obras de “urbanización de parcela con destino a futuro centro de saúde”, incluídas no Plan Provincial de Cooperación ás Obras e Servizos de competencia municipal co número 192, aprobado definitivamente o 29 de xaneiro de 2021 (BOP nº 33, de 10 de febreiro de 2021), no termo municipal de Boborás.

A comisión queda informada.

3º.- RESOLUCIÓN DO RECURSO DE REPOSICIÓN FORMULADO POR D.^a HILDA LÓPEZ LÓPEZ, CONTRA O ACORDO DA XUNTA DE GOBERNO DO 21 DE XUÑO DE 2021, POLO QUE SE APROBOU DE XEITO DEFINITIVO O EXPEDIENTE DE EXPROPIACIÓN PARA EXECUCIÓN DA OBRA DE SANEAMENTO EN CORNEDA E FERRADAL E ACONDICIONAMENTO DE CAMIÑOS EN SAN CIBRAO, OUTEIRO DE BEACÁN E OUTROS NÚCLEOS NO MUNICIPIO DA PEROXA, N.º 62/POS/2020

O Sr. secretario expón o contido da proposta.

D. Aurentino Alonso Araújo, do Grupo Socialista, indica que unha vez examinada a documentación técnica do proxecto, e aínda que é unha cuestión máis técnica que do expediente expropiatorio, sinala que existe unha vivenda que se ve afectada pola expropiación, no que parece unha actuación un tanto arbitraria da administración. Trátase da expropiación das escaleiras de acceso á dita vivenda e a solución que se propón no proxecto é

localizar precisamente un chanzo dentro do dominio público viario, o que é moi cuestionable desde o punto de vista da seguridade e tendo en conta ademais que existen outros elementos da vivenda, como beirís, canlóns ou reixas nas fiestras, que tamén se localizan no dito dominio público viario. Solicita que se revise a solución proposta.

Non se producen máis intervencións e co voto favorable do Grupo Popular (5), de DO (1) e da/o deputada/o non adscritos (2) e a abstención do Grupo Socialista (3) e do BNG (1) a comisión ditamina favorablemente a adopción, por parte da Xunta de Goberno, do seguinte acordo:

Resolver o recurso de reposición interposto por dona Hilda López López, contra o acordo da Xunta de Goberno do 21 de xuño de 2021, no seguinte sentido:

1º.- Estimar parcialmente o recurso de reposición interposto por D^a Hilda López López, no relativo a súa pretensión de considerar a recorrente e á súa irmá, D.^a Elena López López, para os efectos da tramitación do expediente expropiatorio, como copropietarias expropiadas respecto da parcela 17 (referencia catastral número 001500600NH00A0001MA do Catastro inmobiliario do municipio da Peroxa) do devandito expediente expropiatorio, segundo o informe do xefe do Negociado de Expropiacións, que di o seguinte:

“Por parte da recorrente, D.^a Hilda López López, manifestase que xunto coa súa irmá, D.^a Elena López López son herdeiras universais e por partes iguais de D. Jaime López Lobelle. Por parte da recorrente achegouse copia do testamento de D. Jaime López Lobelle e certificados de defunción deste e da súa esposa. Examinada a documentación achegada pola recorrente, queda acreditada a condición de herdeiras universais por partes iguais de D.^a Hilda López López e da súa irmá, D.^a Elena López López, motivo polo que procede estimar o seu recurso neste punto e polo tanto consideralas, para os efectos da tramitación do expediente expropiatorio, como copropietarias expropiadas respecto da parcela 17 do citado expediente, identificada coa referencia catastral número 001500600NH00A0001MA do Catastro inmobiliario do municipio da Peroxa”

2º.- Desestimar as restantes pretensións esgrimidas pola parte recorrente no escrito do recurso, polos motivos indicados no informe do xefe do Negociado de Expropiacións da Deputación, no que se indica o seguinte:

“En relación coa non acreditación da concorrencia da necesidade de ocupación respecto da franxa de terreo de 11,85 m², propiedade da recorrente afectada polo expediente expropiatorio, cabe sinalar que segundo o artigo 15 da Lei de 16 de decembro de 1954, de expropiación forzosa “... *a Administración resolverá sobre a necesidade concreta de ocupar os bens ou adquirir os dereitos que sexan estritamente indispensables para o fin da expropiación...*”. Polo tanto, toda expropiación forzosa debe limitarse a ocupar os bens e

dereitos estritamente necesarios para o emprazamento das instalacións e servizos necesarios co mínimo sacrificio posible da propiedade privada. O contido deste último precepto legal é claro, deberán expropiarse os bens estritamente indispensables para a execución da obra declarada de utilidade pública.

Temos que ter presente que prevalecerá, neste particular, o interese público da obra sobre os intereses privados dos titulares dos terreos afectados á súa execución, de modo que, todo os prexuízos derivados da execución da obra declarada de utilidade pública compensaranse no seo do expediente de expropiación forzosa que se tramite, no seu momento procedimental, coa determinación e pago do prezo xusto.

De conformidade co exposto, debemos sinalar que a franxa de terreo da recorrente está incluída entre os bens e dereitos afectados polo proxecto aprobado mediante resolución número 44/2020 da Alcaldía do Concello da Peroxa para a execución das obras de acondicionamento de acceso nos Peares, coas que se pretende ensanchar a estrada Casdevil - Peares, de titularidade municipal, á altura do n.º 6, ao tratarse dunha zona bastante estreita que representa unha mingua da seguridade viaria.

Polo tanto, ao tratarse do ensanche dunha estrada de titularidade municipal, é de aplicación a *Lei 8/2013, do 28 de xuño, de estradas de Galicia*.

O artigo 22 da devandita Lei establece que *“A aprobación definitiva dos anteproxectos, proxectos de trazado ou proxectos de construción implicará a declaración de utilidade pública, da necesidade de ocupación dos bens e de adquisición dos dereitos necesarios para a execución das obras, dos depósitos dos materiais sobrantes e dos préstamos necesarios para executalas, sempre que veñan previstos no seu proxecto, así como para o trazado de planta do proxecto e para as modificacións deste que, no seu caso, se puidesen aprobar posteriormente, e da urxencia da ocupación, todo iso para os efectos de expropiación, ocupación temporal ou imposición ou modificación de servidumes”*.

Polo tanto, e tendo en conta o exposto nos parágrafos anteriores, ningunha dúbida temos no senso da concorrencia da necesidade de ocupación respecto da franxa de terreo de 11,85 m², propiedade da parte recorrente, ao ser estritamente necesaria para a consecución da finalidade da obra declarada de utilidade pública, ao atoparse incluída nos bens e dereitos previstos no proxecto aprobado mediante resolución número 44/2020 da Alcaldía do Concello da Peroxa, para á execución das obras de acondicionamento de acceso nos Peares, para ensanchar a estrada Casdevil – Peares.

Por todo o exposto neste apartado, procede desestimar o recurso de reposición neste punto.

En relación ao incumprimento da normativa vixente aplicable, a este respecto cabe sinalar que a relación de bens e dereitos afectados xa foi publicada durante o trámite de información pública aberto durante a tramitación do procedemento de aprobación do proxecto de trazado viario. En calquera caso, para garantir a seguridade xurídica do procedemento de expropiación que agora se tramita, a Administración expropiante decidiu abrir un novo trámite de información pública da relación inicial de bens e dereitos dentro do expediente expropiatorio.

Por todo iso debemos concluír que non é certa a infracción da normativa invocada pola parte alegante, constando no procedemento a apertura do trámite de información pública na que xa se relacionaban os bens e dereitos expropiados

Por todo iso, consideramos que non existe o incumprimento denunciado pola parte recorrente e, en consecuencia, debemos desestimar o motivo alegado.

En relación coa súa oposición respecto á contratación da obra e a non satisfacción dos principios da contratación pública, debemos sinalar que son cuestións totalmente alleas ao contido da resolución obxecto deste recurso e que deberán dilucidarse, de ser o caso, noutros ámbitos administrativos ou xudiciais. En consecuencia co que antecede, procede desestimar o recurso de reposición neste particular.

No relativo á súa oposición respecto ao proxecto, por incorrer este en diversos incumprimentos normativos de obrigado cumprimento relativos á ausencia de levantamento topográfico, en materia de accesibilidade, acceso á edificación, ausencia de procedemento legal para a súa aprobación... cabe sinalar que a resolución impugnada pola recorrente é o acordo adoptado pola Xunta de Goberno da Deputación de Ourense, na súa sesión ordinaria do 21 de xuño de 2021, polo que se aprobou de maneira definitiva a necesidade de ocupación da relación de bens e dereitos afectados pola tramitación do expediente de expropiación para a execución das obras de saneamento en Corneda e Ferradal e acondicionamento de camiños en San Cibrao, Outeiro de Beacán e outros núcleos do municipio da Peroxa, n.º 62/POS/2020, no termo municipal da Peroxa, de maneira que os motivos do recurso dirixidos a impugnar o proxecto e as súas eventuais irregularidades na tramitación deste son totalmente alleas ao contido da resolución obxecto do recurso, debendo diferenciarse entre o proxecto que motiva a expropiación e os actos que inician e tramitan o procedemento expropiatorio ao tratarse de instrumentos xurídicos e procedementos diferentes.

Tamén debemos considerar o feito de que o proxecto destas obras non foi impugnado pola parte recorrente, tratándose logo, dun acto consentido e firme.

Non obstante, e a pesar do sinalado neste apartado, a Administración expropiante solicitou informe ao autor do proxecto, D. Daniel Durán Arriero, enxeñeiro de camiños, canles e portos sobre as cuestións formuladas pola recorrente neste apartado, e que a continuación reproducimos de xeito literal:

“Daniel Durán Arriero, enxeñeiro de camiños, canles e portos, en representación da empresa EIC DURÁN S.L, como redactor do documento “Expediente de expropiación correspondente ás obras de: Sto. CORNEDA, FERRADAL/AC. CNOS. CIBRAO”, emito o seguinte informe:

Na alegación segunda do recurso indicase fundamentalmente que no proxecto construtivo non xustifica “de ningún modo” o criterio técnico aplicado na decisión de demoler parte do inmovible afectado pola expropiación. Ó mesmo tempo, afirmase que non se acota a sección transversal resultante da actuación nin se acredita a intensidade de tráfico soportado polo vial municipal.

Na alegación terceira do recurso faise referencia a que a contratación non asegura unha eficiente utilización dos fondos públicos ó non supoñer ningún tipo de mellora na seguridade da vía, tendo en conta que non se intervén sobre aqueles lugares onde o perigo de visibilidade, acceso, etc..., son máis sensibles e prexudiciais para a seguridade da vía e, polo tanto, xúlgase á actuación proxectada como discrecional, arbitraria e non xustificable á vista dos obxectivos perseguidos.

Na alegación cuarta do recurso sinálase fundamentalmente que o Proxecto construtivo non inclúe medicións ou precisión sobre as dimensións existentes e modificadas da calzada e da rampla de acceso. Tamén fai referencia a que o proxecto non analiza, xustifica nin desenvolve o cumprimento da normativa vixente de accesibilidade e indica que o Proxecto non xustifica as esixencias necesarias ó respecto da impermeabilización prevista para o zócalo resultante tras a demolición.

RESPUESTA ALEGACIONES:

***Desestímase;** a xuízo do que subscribe, a demolición da soleira ou zócalo e as escaleiras existentes supoñen unha evidente mellora da seguridade viaria no tramo en cuestión, tendo en conta que os devanditos elemento interfíren na traxectoria dos vehículos que circulan en dirección ó Centro de Saúde, a marxe da sección transversal resultante unha vez executada a demolición e da intensidade de tráfico soportado polo vial.*

***Desestímase;** resulta obrigado sinalar que o obxecto do proxecto construtivo non é unha mellora integral da seguridade viaria da estrada en toda a súa lonxitude, senón o de actuar puntualmente nun lugar onde, pola singularidade do seu trazado e a súa escasa visibilidade, considéranse un punto crítico susceptible de provocar un aumento da sinistralidade viaria. En consecuencia, en ningún documento do Proxecto construtivo faise alusión a unha hipotética reforma do trazado da estrada en aras dunha mellora integral da seguridade viaria na súa travesía polo núcleo de Os Peares, senón que formula unha actuación que, pola súa propia condición, conveniencia e oportunidade, non pode ser catalogada de arbitraria e non xustificable.*

***Desestímase;** resulta obrigado sinalar que en documento nº 4 del Proxecto “Presuposto”, no capítulo nº 12 do apartado “Medición” defínense para cada unha das partidas relativas a esta actuación todas as medicións co nivel de detalle necesario para executar correctamente as obras, non sendo estritamente necesario que se acouten expresamente nos planos do proxecto, xa que estes son o “suficientemente descritivos para que poidan deducirse deles as medicións que sirvan de base para as valoracións pertinentes e para a exacta realización da obra”. Nesta liña, a unidade de código 1900 describe cada unha das partidas unitarias que conforman a execución da nova escaleira de 1,30 m de lonxitude de acceso á vivenda, facendo referencia á altura das pegadas e tabicas e ó espesor do cemento de formigón armado que o sustenta.*

En canto ás esixencias plenas en materia de accesibilidade, temos que insistir en que hoxe en día non hai rampla existente, non cumpre coa normativa vixente de accesibilidade, e que o ámbito de actuación do presente proxecto é unha zona consolidada, na que non resulta posible lograr o cumprimento total dos requisitos establecidos para que o itinerario de acceso á vivenda sexa plenamente accesible sen interferir na traxectoria do tráfico rodado dos vehículos debido ás condicións topográficas e morfolóxicas do lugar.

Por último, sinalar que, a xuízo do que subscribe, a formulación de impermeabilización da parede do inmovible está suficientemente detallado e definido nos documentos do proxecto, sen máis xustificación que o criterio escollido no exercicio das miñas competencias como técnico redactor do Proxecto construtivo”.

En consecuencia co que antecede, procede desestimar o recurso de reposición neste particular”.

3º. Notificarlle este acordo á interesada, de conformidade coa normativa vixente.

4º.- BASES REGULADORAS DO PROGRAMA PROVINCIAL DE COOPERACIÓN COS CONCELLOS E A ENTIDADE LOCAL MENOR DE BERÁN EN MATERIA DE MOCIDADE PARA O EXERCICIO 2022

O Sr. secretario explica o contido da proposta.

D.^a Rosario Rodríguez Delgado, do Grupo Socialista, indica que as bases deste programa son un copia e pega do exercicio anterior e agradece que a última hora se incluíse a cláusula que permite que os concellos destinen o importe a gastos COVID. En todo caso insiste en que desde o seu grupo se solicita que todos estes programas de cooperación se unifiquen nun plan único onde sexa cada concello o que decida libremente o destino dos fondos.

Non se producen máis intervencións e co voto favorable do Grupo Popular (5) de DO (1) e da/o deputada/o non adscritos (2) e a abstención do Grupo Socialista (3) e do BNG (1) a comisión ditamina favorablemente a adopción, por parte do Pleno, do seguinte acordo:

1º.- Aprobar inicialmente as bases reguladoras do Programa provincial de cooperación cos concellos e a entidade local menor de Berán en materia de mocidade para o exercicio 2022, co seguinte teor literal:

1ª) Obxecto:

Constitúe o obxecto das presentes bases a regulación do Programa provincial de cooperación cos concellos e a entidade local menor de Berán en materia de mocidade para o exercicio 2022.

A finalidade deste Programa é contribuír ao financiamento das actividades desenvolvidas polos concellos da provincia e a entidade local menor de Berán en prol da mocidade ao longo do exercicio 2022.

2ª) Beneficiarios. Gastos subvencionables.

1. Poderán obter subvención no marco do programa regulado nas presentes bases os concellos da provincia de menos de 20.000 habitantes e a entidade local menor de Berán, cando desenvolvan actividades en prol da mocidade durante o exercicio 2022.

2. Terán a consideración de gastos subvencionables todos os que, tendo este carácter conforme coa lexislación vixente en materia de subvencións, financien as anteditas actividades, sempre que fosen autorizados a partir do 1 de xaneiro de 2022.

3. Tendo en conta as dificultades económicas que poden atravesar os concellos no exercicio 2022, como consecuencia da loita contra a pandemia do COVID-19, no presente exercicio permitírase, de forma excepcional, que os concellos poidan utilizar a dotación económica deste programa naquilo que consideren máis urxente e necesario, excluindo gastos de retribucións, axudas de custo e asistencias de cargos representativos ou de designación

política e dos gastos de servizos que se atopen total ou parcialmente financiados con achegas da Deputación Provincial diferentes ás previstas nas bases.

3ª) Contía das subvencións:

A subvención concedida a cada concello poderá acadar a contía máxima de 6.000,00 € e ata o 100% dos custos indisolublemente vinculados ao desenvolvemento das actividades subvencionadas. A subvención concedida á entidade local menor de Berán poderá acadar a contía máxima de 3.000,00 € e ata o 100% dos custos indisolublemente vinculados ao desenvolvemento das actividades subvencionadas.

4ª) Disposibilidades orzamentarias:

O financiamento das subvencións reguladas no presente Programa realizarase con cargo á aplicación 46207/24111 dos orzamentos da Deputación Provincial de Ourense para o exercicio 2022, tramitándose con carácter anticipado o Programa ao abeiro do disposto no artigo 56.1 do Real decreto 887/2006, do 21 de xullo, polo que se aprobou o Regulamento da Lei xeral de subvencións. Para estes efectos, serán de aplicación as seguintes regras especiais:

1ª) A execución do Programa queda condicionada á existencia de crédito adecuado e suficiente nos orzamentos da Deputación Provincial para o exercicio 2022, tendo carácter puramente estimatorio a contía total máxima prevista nas presentes bases.

2ª) A contía total máxima estimada é de 549.000,00 €.

3ª) No expediente de gasto que se tramite para a aprobación do Programa, a certificación de existencia de crédito substituirase por unha certificación relativa á concorrencia dalgunha das circunstancias previstas no artigo 56.1 do RD 887/2006.

4ª) Os efectos de tódolos actos de trámite ditados no expediente de gasto entenderanse condicionados a que, ao ditarse a resolución de concesión, subsistan as mesmas circunstancias de feito e de dereito existentes no momento en que se produciron eses actos.

5ª) A resolución de concesión deberá ditarse no exercicio 2022, unha vez aprobado definitivamente e publicado na forma legalmente prevista o orzamento da Deputación Provincial para o dito exercicio.

5ª) Resolucións de adhesión ao programa e solicitudes de subvención: prazos, lugar de presentación e documentación para presentar:

As resolucións de adhesión ao programa -que inclúen as solicitudes de subvención- subscritas polo alcalde ou representante legal interesado, ou concelleiro no que delegue, irán dirixidas á Presidencia da Deputación Provincial e deberán presentarse no Rexistro

Electrónico Xeral da Deputación, ou en calquera dos lugares previstos no artigo 16.4 da Lei 39/2015, de 1 de outubro, do procedemento administrativo común das administracións públicas, consonte co modelo que se achega como anexo I a estas bases.

O prazo de presentación será dun mes, contado a partir do día seguinte ao da data de publicación das presentes bases no Boletín Oficial da Provincia. O dito prazo terá carácter improrrogable.

As solicitudes irán acompañadas dunha declaración do conxunto de axudas ou subvencións públicas solicitadas pola entidade ou que lle fosen concedidas para o financiamento das actividades para as que se solicita subvención que se presentará consonte co modelo que se achega como anexo II a estas bases.

6ª) Procedemento de adhesión. Resolución de adhesión. Publicación.

As solicitudes de adhesión presentadas remitiránse ao Servizo de Investimentos, Contratación e Patrimonio da Deputación, para a instrución do expediente.

Unha vez examinada a documentación, a Presidencia poderá conceder un prazo de ata dez días hábiles para a emenda de deficiencias materiais na documentación presentada.

Comprobada a regularidade do procedemento seguido e a corrección da documentación presentada, mediante resolución da Presidencia autorizarase a adhesión das entidades solicitantes, agás nos seguintes casos:

- a) Que a solicitude se formulase fóra de prazo.*
- b) Que a solicitude non reunise os requisitos establecidos na base 5ª, e non se emendasen as deficiencias advertidas no prazo concedido.*

A resolución de concesión das subvencións adoptarase antes do 19 de marzo de 2022 e será obxecto de publicación no Boletín Oficial da Provincia, con expresión dos beneficiarios e contía das axudas concedidas. Esta publicación substituirá á notificación individual para todos os efectos, ao abeiro do establecido no artigo 45.1.b) da Lei 39/2015, de 1 de outubro.

7ª) Contía das subvencións:

Cada concello adherido disporá dunha axuda por importe de 6.000 €. A entidade local menor de Berán disporá dunha axuda por importe de 3.000,00 €. Esta subvención entenderase concedida, para todos os efectos, polo mero acto de aprobación da adhesión.

Non obstante o anterior, a achega minorarase na contía que corresponda nos seguintes supostos:

- Se o gasto efectivo das actividades subvencionadas fose inferior á dita cantidade.*

- Se as achegas doutras administracións públicas que financian as actuacións exceden, en conxunto coa concedida pola Deputación, do 100% do custo das actividades subvencionadas.

A redución da contía das subvencións declarase na resolución da peza separada de xustificación da subvención.

Os remanentes que se produzan como consecuencia da aplicación das regras anteriores reintegraranse ás arcas provinciais, sen aumentar as achegas para percibir polas entidades beneficiarias.

8ª) Xustificación da subvención:

1. As entidades beneficiarias deberán xustificar a subvención ante a Deputación, antes de que remate o día 30 de novembro de 2022. Este prazo terá carácter improrrogable, agás causas de forza maior debidamente acreditadas. En todo caso, a prórroga deberá solicitarse expresamente antes de que remate o día 30 de novembro de 2022 e poderá concederse, como máximo, ata o día 10 de decembro de 2022.

2. A xustificación realizarase mediante a presentación dos seguintes documentos:

A) Certificación expedida polo secretario da entidade na que se indique o seguinte:

- Relación de actividades realizadas con cargo á subvención, indicando o seu obxecto e duración.

- Contía do gasto subvencionable que foi obxecto de recoñecemento da obrigación no exercicio 2022.

- Importe das subvencións ou axudas públicas concedidas para o financiamento das actividades subvencionadas.

B) Certificación da conta corrente da entidade para a realización do pagamento da subvención.

C) Unha fotografía do cartel informativo ao que se refire a base 9ª, no que se reflicta a súa localización e a mención expresa ao financiamento por parte da Deputación de Ourense.

3. Ao abeiro do establecido no artigo 31.2 da Lei xeral de subvencións, considerárase como gasto efectivamente realizado aquel cuxa obriga de pago fose contraída antes do vencemento do prazo de xustificación da subvención. En consecuencia, non será preciso acreditar a realización do pago no acto de xustificación.

Non obstante o anterior, e no exercicio das súas facultades de control financeiro, a Intervención poderá realizar procedementos simplificados de control financeiro, consistentes en esixir, a partir do mes seguinte ao do pagamento da subvención, a acreditación do pago da

totalidade dos gastos xustificadas. O incumprimento desta obriga dará lugar á obriga de reintegro por parte do beneficiario, así como a imposición das sancións que procedan.

4. Para considerar xustificada a subvención, os concellos deberán acreditar a realización do gasto por unha contía igual ou superior a 6.000,00 € e a entidade local menor de Berán por unha contía igual ou superior 3.000,00 €. No suposto en que só se xustifique unha contía inferior, a subvención reducirase proporcionalmente. Igualmente, no suposto no que a entidade beneficiaria percibise subvencións ou axudas que, en conxunto coa concedida ao abeiro do presente programa, excedan o 100 do custo soportado, a subvención reducirase ata alcanzar o dito límite do 100 %.

A falla de xustificación en prazo dará lugar á perda total do dereito á subvención, que será declarada pola Presidencia.

A falla de xustificación da obriga de publicidade establecida na base 9ª dará lugar a unha redución do importe da subvención nun 20 %.

9ª) Obrigas dos beneficiarios:

Con carácter xeral, as entidades beneficiarias asumirán todas as obrigas impostas pola Lei xeral de subvencións. En particular, quedan suxeitos ás obrigas de control financeiro e reintegro nos casos previstos nestas bases e na lexislación vixente.

No local onde se realicen as actividades subvencionadas deberá figurar, de xeito visible, un cartel informativo -no modelo normalizado que se publicará na web da Deputación - no cal constará o financiamento por parte da Deputación Provincial de Ourense.

10ª) Normativa supletoria:

De conformidade co establecido na Disposición adicional 8ª da Lei xeral de subvencións, esta lei será de aplicación ás subvencións reguladas nestas bases exclusivamente como norma supletoria, para integrar posibles baleiros de regulación, así como naqueles casos nos que as bases remiten á dita normativa.

ANEXO I

MODELO DE RESOLUCIÓN DE ADHESIÓN AO PROGRAMA DE COOPERACIÓN

Unha vez vistas as bases reguladoras do Programa provincial de cooperación cos concellos e a entidade local menor de Berán en materia de mocidade para o exercicio 2022 e no uso das atribucións que me confire o ordenamento xurídico, dispoño:

1ª) Aprobar a adhesión do Concello / Entidade de _____ ao Programa provincial de cooperación cos concellos e a entidade local menor de Berán en materia de mocidade para o

exercicio 2022, solicitando a concesión dunha subvención por importe de euros.

2º) Asumir expresamente as obrigas que como beneficiario lle corresponden no programa de cooperación.

3º) Declarar que o Concello/ a Entidade de _____ non se atopa incurso en prohibición de obter subvencións da Deputación Provincial conforme co que dispón o artigo 13 da Lei xeral de subvencións, manifestando, igualmente, estar ao corrente das obrigas tributarias e de Seguridade Social.

Ourense, ____ de _____ de 202__

Asdo.: _____

SR. PRESIDENTE DA DEPUTACIÓN PROVINCIAL DE OURENSE.

ANEXO II
DECLARACIÓN AXUDAS

Don/Dona _____, alcalde/sa do
Concello/presidente Entidade de _____, con CIF _____,

DECLARA

☐ Non ter solicitada, nin en consecuencia, ter concedida, ningunha axuda para a mesma finalidade, sexa pública ou privada.

☐ Que presentou a/as solicitude/s e que lle foi/foron concedida/s, se é o caso, a/s seguinte/s axuda/s para a mesma finalidade:

Organismo ou entidade ao que solicita	Data solicitude	Concesión*	Contía

*No caso de estar pendente a resolución dalgunha solicitude, indicárase "pendente" na columna.

No caso de solicitudes denegadas, farase constar "denegada".

Ourense, ____ de ____ de 202__

Asdo.: _____

2º.- Someter a trámite de información pública, mediante anuncio publicado no Boletín Oficial da Provincia de Ourense e na sede electrónica da Deputación, as bases inicialmente aprobadas polo prazo de 10 días hábiles, durante os cales as entidades interesadas poderán formular as alegacións ou suxestións que consideren oportunas, que deberán ser resoltas motivadamente no acto de aprobación definitiva.

No caso de non formularse alegacións en prazo, entenderanse automaticamente aprobadas de forma definitiva, procedendo á súa publicación no Boletín Oficial da Provincia.

5º.- BASES REGULADORAS DO PROGRAMA PROVINCIAL DE COOPERACIÓN COS CONCELLOS E A ENTIDADE LOCAL MENOR DE BERÁN EN MATERIA DE EMPREGABILIDADE PARA O EXERCICIO 2022

O Sr. secretario expón o contido da proposta.

D. Bernardo Varela López, do BNG, sinala que este programa que se propón, cunha subvención idéntica para cada concello, leva a unha situación tan paradoxal como que concellos con ningún ou moi poucos desempregados reciban o mesmo importe que concellos que superan os 800 desempregados na provincia. Indica que o desexable sería que se incluíse tamén unha cláusula COVID similar á de Mocidade e que se incrementase o seu financiamento ata os 40.000 euros por concello, como se fixo no exercicio 2020.

D.ª Rosario Rodríguez Delgado, do Grupo Socialista, sinala que existe tamén un erro na aplicación orzamentaria que financia este programa e que se une a petición de incremento do importe deste programa ata os 40.000 euros por concello. Por último sinala que se no pleno de setembro o grupo de goberno alardeou por presentar o orzamento máis alto da Deputación de Ourense non se entende que non se incremente nin un euro nos programas de cooperación cos concellos.

Non se producen máis intervencións e co voto favorable do Grupo Popular (5), de DO (1) e da deputada non adscrita, e a abstención do Grupo Socialista (3), do BNG (1) e do deputado non adscrito, a comisión ditamina favorablemente a adopción, por parte do Pleno, do seguinte acordo:

1º.- Aprobar inicialmente as bases reguladoras do Programa provincial de cooperación cos concellos e a entidade local menor de Berán en materia de empregabilidade para o exercicio 2022, co seguinte teor literal:

1ª) Obxecto:

Constitúe o obxecto das presentes bases a regulación do Programa provincial de cooperación cos concellos e a entidade local menor de Berán en materia de empregabilidade para o exercicio 2022.

A finalidade deste Programa é a contribución ao sostemento económico dos servizos de competencia municipal e da entidade local menor de Berán posibilitando o complemento dos recursos humanos necesarios co dito fin, tanto a través das figuras contractuais propias da lexislación laboral como a través de contratos administrativos ou nomeamentos de persoal funcionario interino, de ser o caso, mediante a concesión de subvencións, en réxime de concorrencia non competitiva, para o financiamento dos ditos contratos ou nomeamentos.

2ª) Beneficiarios. Gastos subvencionables.

1. Poderán obter subvención no marco do programa regulado nas presentes bases os concellos da provincia de menos de 20.000 habitantes e a entidade local menor de Berán, cando contraten persoal en réxime de dereito laboral, efectúen nomeamentos de persoal funcionario interino ou subscriban contratos administrativos, típicos ou especiais, con persoas físicas suxeitas ao réxime de autónomos, para a realización de actividades da súa competencia durante o exercicio 2022. Considéranse subvencionables as contratacións ou nomeamentos que se realicen a partir do 1 de xaneiro de 2022. Igualmente serán subvencionables as contratacións ou nomeamentos procedentes de anos anteriores que subsistan no exercicio 2022, exclusivamente en canto os custos devindicados a partir do 1 de xaneiro de 2022.

2. Terán a consideración de gastos subvencionables todos os que, tendo este carácter conforme coa lexislación vixente en materia de subvencións, financien as anteditas contratacións ou nomeamentos, incluíndo gastos salariais e de Seguridade Social, así como os honorarios ou contraprestacións económicas por servizos profesionais prestados por autónomos.

3ª) Contía das subvencións:

A subvención concedida a cada concello poderá acadar a contía máxima de 20.000,00 € e ata o 100% dos custos indisolublemente vinculados aos contratos ou nomeamentos subvencionados. A subvención concedida á entidade local menor de Berán poderá acadar a

contía máxima de 10.000,00 € e ata o 100% dos custos indisolublemente vinculados aos contratos ou nomeamentos subvencionados.

4ª) Disponibilidades orzamentarias:

O financiamento das subvencións reguladas no presente Programa realizarase con cargo á aplicación 46211/24111 dos orzamentos da Deputación Provincial de Ourense para o exercicio 2022, tramitándose con carácter anticipado o Programa ao abeiro do disposto no artigo 56.1 do Real decreto 887/2006, do 21 de xullo, polo que se aprobou o Regulamento da Lei xeral de subvencións. Para estes efectos, serán de aplicación as seguintes regras especiais:

1ª) A execución do Programa queda condicionada á existencia de crédito adecuado e suficiente nos orzamentos da Deputación Provincial para o exercicio 2022, tendo carácter puramente estimatorio a contía total máxima prevista nas presentes bases.

2ª) A contía total máxima estimada é de 1.830.000,00 €.

3ª) No expediente de gasto que se tramite para a aprobación do Programa, a certificación de existencia de crédito substituirase por unha certificación relativa á concorrencia dalgunha das circunstancias previstas no artigo 56.1 do RD 887/2006.

4ª) Os efectos de todos os actos de trámite ditados no expediente de gasto entenderanse condicionados a que, ao ditarse a resolución de concesión, subsistan as mesmas circunstancias de feito e de dereito existentes no momento en que se produciron eses actos.

5ª) A resolución de concesión deberá ditarse no exercicio 2022, unha vez aprobado definitivamente e publicado na forma legalmente prevista o orzamento da Deputación Provincial para o dito exercicio.

5ª) Resolucións de adhesión ao programa e solicitudes de subvención: prazos, lugar de presentación e documentación a presentar:

As resolucións de adhesión ao programa -que inclúen as solicitudes de subvención- subscritas polo alcalde ou representante legal interesado, ou concelleiro no que delegue, irán dirixidas á Presidencia da Deputación Provincial e deberán presentarse no Rexistro Electrónico Xeral da Deputación, ou en calquera dos lugares previstos no artigo 16.4 da Lei 39/2015, do 1 de outubro, do procedemento administrativo común das administracións públicas, consonte co modelo que se achega como anexo I a estas bases.

O prazo de presentación será dun mes, contado a partir do día seguinte ao da data de publicación das presentes bases no Boletín Oficial da Provincia. O dito prazo terá carácter improrrogable.

As solicitudes irán acompañadas dunha declaración do conxunto de axudas ou subvencións públicas solicitadas pola entidade ou que lle fosen concedidas para o financiamento das actividades para as que se solicita subvención que se presentará consonte co modelo que se achega como anexo II a estas bases.

6ª) Procedemento de adhesión. Resolución de adhesión. Publicación.

As solicitudes de adhesión presentadas remitiráselle ao Servizo de Investimentos, Contratación e Patrimonio da Deputación, para a instrución do expediente.

Unha vez examinada a documentación, a Presidencia poderá conceder un prazo de ata dez días hábiles para a emenda de deficiencias materiais na documentación presentada.

Comprobada a regularidade do procedemento seguido e a corrección da documentación presentada, mediante resolución da Presidencia autorizarase a adhesión das entidades solicitantes, agás nos seguintes casos:

- a) Que a solicitude se formulase fóra de prazo.*
- b) Que a solicitude non reunise os requisitos establecidos na base 5ª, e non se emendasen as deficiencia advertidas no prazo concedido.*

A resolución de concesión das subvencións adoptarase antes do 19 de marzo de 2022 e será obxecto de publicación no Boletín Oficial da Provincia, con expresión dos beneficiarios e contía das axudas concedidas. Esta publicación substituirá á notificación individual para todos os efectos, ao abeiro do establecido no artigo 45.1.b) da Lei 39/2015, de 1 de outubro.

7ª) Contía das subvencións:

Cada concello adherido disporá dunha axuda por importe de 20.000,00 €. A entidade local menor de Berán disporá dunha axuda por importe de 10.000,00 €. Esta subvención entenderase concedida, para todos os efectos, polo mero acto de aprobación da adhesión.

Non obstante o anterior, a achega minorarase na contía que corresponda nos seguintes supostos:

- Se o gasto efectivo do contrato ou nomeamento subvencionado fose inferior á dita cantidade.*
- Se as achegas doutras administracións públicas que financian a actuación exceden, en conxunto coa concedida pola Deputación, do 100% do custo da contratación ou*

nomeamento subvencionado.

A redución da contía das subvencións declararase na resolución da peza separada de xustificación da subvención.

Os remanentes que se produzan como consecuencia da aplicación das regras anteriores reintegraranse ás arcas provinciais, sen aumentar as achegas para percibir polos concellos beneficiarios.

8ª) Xustificación da subvención:

As entidades beneficiarias deberán xustificar a subvención ante a Deputación, antes de que remate o día 30 de novembro de 2022. Este prazo terá carácter improrrogable, agás causas de forza maior debidamente acreditadas. En todo caso, a prórroga deberá solicitarse expresamente antes de que remate o día 30 de novembro de 2022 e poderá concederse, como máximo, ata o día 10 de decembro de 2022.

A xustificación realizarase mediante a presentación dos seguintes documentos:

A) Certificación expedida polo secretario da entidade na que se indique o seguinte:

- Relación de contratos ou nomeamentos realizados con cargo á subvención, indicando o seu obxecto e duración.

- Contía do gasto subvencionable que foi obxecto de recoñecemento da obrigaón no exercicio 2022.

- Importe das subvencións ou axudas públicas concedidas para o financiamento dos contratos subvencionados.

B) Certificación da conta corrente da entidade para a realización do pagamento da subvención.

C) Unha fotografía do cartel informativo ao que se refire a base 9ª, no que se reflicta a súa localización e a mención expresa ao financiamento por parte da Deputación de Ourense.

3. Ao abeiro do establecido no artigo 31.2 da Lei xeral de subvencións, considerarase como gasto efectivamente realizado aquel cuxa obriga de pago fose contraída antes do vencemento do prazo de xustificación da subvención. En consecuencia, non será preciso acreditar a realización do pago no acto de xustificación.

Non obstante o anterior, e no exercicio das súas facultades de control financeiro, a Intervención poderá realizar procedementos simplificados de control financeiro, consistentes en esixir, a partir do mes seguinte ao do pagamento da subvención, a acreditación do pago da

totalidade dos gastos xustificados. O incumprimento desta obriga dará lugar á obriga de reintegro por parte do beneficiario, así como a imposición das sancións que procedan.

4. Para considerar xustificada a subvención os concellos beneficiarios deberán acreditar a realización de gasto por unha contía igual ou superior a 20.000,00 euros e a entidade local menor de Berán por unha contía igual ou superior a 10.000,00 euros. No suposto en que só se xustifique unha contía inferior, a subvención reducirase proporcionalmente. Igualmente, no suposto no que a entidade beneficiaria percibise subvencións ou axudas que, en conxunto coa concedida ao abeiro do presente programa, excedan do 100% do custo soportado, a subvención reducirase ata alcanzar o dito límite do 100 %.

A falla de xustificación en prazo dará lugar á perda total do dereito á subvención, que será declarada pola Presidencia.

A falla de xustificación da obriga de publicidade establecida na base 9ª dará lugar unha redución do importe da subvención nun 20 %.

9ª) Obrigas dos beneficiarios:

Con carácter xeral, as entidades beneficiarias asumirán todas as obrigas impostas pola Lei xeral de subvencións. En particular, quedan suxeitos ás obrigas de control financeiro e reintegro nos casos previstos nestas bases e na lexislación vixente.

No local onde se realicen os servizos subvencionados deberá figurar, de xeito visible, un cartel informativo -no modelo normalizado que se publicará na web da Deputación - no cal constará o financiamento por parte da Deputación Provincial de Ourense.

10ª) Normativa supletoria:

De conformidade co establecido na Disposición adicional 8ª da Lei xeral de subvencións, esta lei será de aplicación ás subvencións reguladas nestas bases exclusivamente como norma supletoria, para integrar posibles baleiros de regulación, así como naqueles casos nos que as bases remiten á dita normativa.

ANEXO I

MODELO DE RESOLUCIÓN DE ADHESIÓN AO PROGRAMA DE COOPERACIÓN

Unha vez vistas as bases reguladoras do Programa provincial de cooperación cos concellos e a entidade local menor de Berán en materia de empregabilidade para o exercicio 2022, e no uso das atribucións que me confire o ordenamento xurídico, dispoño:

1º) Aprobar a adhesión do Concello / Entidade de _____ ao Programa provincial de cooperación cos concellos e a entidade local menor de Berán en materia de empregabilidade para o exercicio 2022, solicitando a concesión dunha subvención por importe de euros.

2º) Asumir expresamente as obrigas que como beneficiario lle corresponden no programa de cooperación.

3º) Declarar que o Concello/ a Entidade de _____ non se atopa incurso en prohibición de obter subvencións da Deputación Provincial conforme co que dispón o artigo 13 da Lei xeral de subvencións, manifestando, igualmente, estar ao corrente das obrigas tributarias e de Seguridade Social.

Ourense, ____ de _____ de 202__

Asdo.: _____

SR. PRESIDENTE DA DEPUTACIÓN PROVINCIAL DE OURENSE.

ANEXO II

DECLARACIÓN AXUDAS

Don/Dona _____, alcalde/sa do Concello/presidente Entidade de _____, con CIF _____,

DECLARA

☐ Non ter solicitada, nin en consecuencia, ter concedida, ningunha axuda para a mesma finalidade, sexa pública ou privada.

☐ Que presentou a/as solicitude/s e que lle foi/foron concedida/s, se é o caso, a/s seguinte/s axuda/s para a mesma finalidade:

Organismo ou entidade ao que solicita	Data solicitude	Concesión*	Contía

**No caso de estar pendente a resolución dalgunha solicitude, indicárase “pendente” na columna.*

No caso de solicitudes denegadas, farase constar “denegada”.

Ourense, ____ de _____ de 202__

Asdo.: _____

2º.- Someter a trámite de información pública, mediante anuncio publicado no Boletín Oficial da Provincia de Ourense e na sede electrónica da Deputación, as bases inicialmente aprobadas polo prazo de 10 días hábiles, durante os cales as entidades interesadas poderán formular as alegacións ou suxestións que consideren oportunas, que deberán ser resoltas motivadamente no acto de aprobación definitiva.

No caso de non formularse alegacións en prazo, entenderanse automaticamente aprobadas de forma definitiva, procedéndose á súa publicación no Boletín Oficial da Provincia.

6º.- BASES REGULADORAS DO PROGRAMA PROVINCIAL DE COOPERACIÓN COS CONCELLOS E MANCOMUNIDADES PARA A REALIZACIÓN DE ACTUACIÓN DE LIMPEZA DAS MARXES DAS REDES VIARIAS MUNICIPAL E PROVINCIAL NO EXERCICIO 2022

O Sr. secretario expón o contido da proposta.

D.^a Rosario Rodríguez Delgado, do Grupo Socialista, sinala que este programa ten unha contía moi limitada para os traballos de mantemento que se necesitan tanto na rede de estradas provincial como na municipal, e pregunta por que existe un incremento de 100.000 euros na partida que financia este programa e isto non se ve reflectido no importe máximo de 4.500 euros que pode percibir cada concello.

O **Sr. interventor** sinala que na previsión de adhesións de anos pasados se fixo unha estimación que foi insuficiente para atender o número de concellos, polo que este ano se incrementa a dita partida.

D.^a Rosario Rodríguez Delgado, do Grupo Socialista, pide que se sexa sensible coas peticións de tramos para rozar que solicitan os concellos, xa que en ocasións se obriga a rozar tramos que son moi complicados, polo que reitera que se atendan todas as peticións dos concellos, como mellores coñecedores das vías do seu termo municipal e que se deixen os tramos máis complicados para a propia Deputación.

O **presidente da comisión** indica que en todo caso, a determinación dos tramos para rozar é realizada sempre desde criterios estritamente técnicos.

Non se producen máis intervencións e co voto favorable do Grupo Popular (5), de DO (1), e da/o deputada/o non adscritos (2) e a abstención do Grupo Socialista (3) e do BNG (1), a comisión ditamina favorablemente a adopción, por parte do Pleno, do seguinte acordo:

1º.- Aprobar inicialmente as bases reguladoras do Programa provincial de cooperación cos concellos e mancomunidades para a realización de actuacións de limpeza das marxes das redes viarias municipal e provincial no exercicio 2022, co seguinte teor literal:

Primeira.- Obxecto:

1. Constitúe o obxecto destas bases a regulación do programa de cooperación cos concellos e mancomunidades para a realización de actuacións de limpeza das marxes das redes viarias municipal e provincial no exercicio 2022.

2. Este programa desenvolverase mediante a concesión de subvencións ás ditadas entidades locais para o financiamento da prestación de servizos de limpeza das marxes da rede viaria local. A finalidade da subvención é colaborar economicamente cos concellos e mancomunidades no sostemento do servizo público de limpeza das marxes da rede viaria municipal (prestación que se considera incluída no servizo mínimo obrigatorio de acceso aos núcleos de poboación, recollido no artigo 26 da Lei de bases de réxime local) e no cumprimento das obrigas establecidas na lexislación galega de prevención de incendios forestais. Esta colaboración condiciónase a que por parte dos concellos e mancomunidades se realicen labores de limpeza das marxes das vías provinciais e municipais, co obxectivo último de garantir o mantemento das vías en condicións axeitadas de limpeza e seguridade, dándolle ademais cumprimento ao establecido na Lei 3/2007, do 9 de abril, de prevención e defensa contra os incendios forestais.

3. Os servizos subvencionados poderán prestarse mediante calquera modo de xestión dos previstos na lexislación de réxime local, sendo subvencionables todos os gastos correntes directos do servizo. Exclúense os gastos de investimento e os indirectos, así como os definidos como non subvencionables nos apartados 7 e 8 do artigo 31 da Lei xeral de subvencións.

Segunda.- Beneficiarios:

Poderán ser beneficiarios das subvencións previstas no presente Programa provincial de cooperación os concellos de menos de 20.000 habitantes e as mancomunidades integradas por estes concellos que cumpran os seguintes requisitos:

a) Prestar o servizo de limpeza das marxes da rede viaria municipal e provincial cunha máquina rozadora con brazo articulado, durante, polo menos, un período mínimo de tres meses no exercicio 2022. Este período mínimo deberá comprender, en todo caso, as datas nas que a Deputación estableza a limpeza obrigatoria dun número mínimo de quilómetros da rede viaria provincial, conforme co previsto na base sétima, apartado b). Nos supostos de períodos de prestación do servizo que non comprendan meses naturais completos, para o cálculo do cumprimento do período mínimo esixible computaranse os días naturais de prestación, considerándose un mes por cada trinta días naturais.

b) Adherirse ao presente Programa de cooperación no prazo e coas formalidades recollidas na base quinta.

Terceira.- Disposibilidades orzamentarias:

O financiamento das subvencións reguladas no presente Programa realizarase con cargo á aplicación 16311/46200 dos orzamentos da Deputación Provincial de Ourense para o exercicio 2022, tramitándose con carácter anticipado o Programa ao abeiro do disposto no artigo 56.1 do Real decreto 887/2006, do 21 de xullo, polo que se aprobou o Regulamento da Lei xeral de subvencións. Para estes efectos, serán de aplicación as seguintes regras especiais:

1ª) A execución do Programa queda condicionada á existencia de crédito adecuado e suficiente nos orzamentos da Deputación Provincial para o exercicio 2022, tendo carácter puramente estimatorio a contía total máxima prevista nas presentes bases.

2ª) A contía total máxima estimada é de 450.000,00 €.

3ª) No expediente de gasto que se tramite para a aprobación do Programa, a certificación de existencia de crédito substituirase por unha certificación relativa á

concorrenza dalgunha das circunstancias previstas no artigo 56.1 do RD 887/2006.

4ª) Os efectos de todos os actos de trámite ditados no expediente de gasto entenderanse condicionados a que, ao ditarse a resolución de concesión, subsistan as mesmas circunstancias de feito e de dereito existentes no momento en que se produciron eses actos.

5ª) A resolución de concesión deberá ditarse no exercicio 2022, unha vez aprobado definitivamente e publicado na forma legalmente prevista o orzamento da Deputación Provincial para o dito exercicio.

Cuarta.- Contía das subvencións:

A contía das subvencións que se concedan ao abeiro deste Programa de cooperación será para o exercicio 2022 de 4.500,00 € por entidade local, con destino ao financiamento dos gastos subvencionables de prestación do servizo.

A contía poderá ser inferior nos casos en que así se solicite expresamente pola entidade local interesada.

En todo caso, a contía da subvención nunca poderá exceder do 100% dos gastos subvencionables soportados pola entidade beneficiaria, polo que se reducirá no importe correspondente para o caso de que o gasto xustificado no citado concepto sexa inferior a 4.500,00 €.

Quinta.- Adhesión ao programa:

Os concellos e mancomunidades que desexen adherirse ao Programa de cooperación regulado nas presentes bases deberán facelo mediante resolución do órgano competente na que se aprobe a dita adhesión. A resolución deberá ter o contido que se recolle no anexo I destas bases, modelo que se poderá utilizar para documentar a dita resolución.

Coa solicitude deberase achegar unha declaración do solicitante da subvención na que figure o conxunto de subvencións e axudas solicitadas para o mesmo fin, tanto as aprobadas ou concedidas, como as pendentes, sexan públicas ou privadas, segundo o modelo anexo II.

A resolución de adhesión deberá presentarse no Rexistro Electrónico Xeral da Deputación, ou en calquera dos lugares previstos no artigo 16.4 da Lei 39/2015, de 1 de outubro, do procedemento administrativo común das administracións públicas.

O prazo de presentación será dun mes, contado a partir do día seguinte ao da data de publicación das presentes bases no Boletín Oficial da Provincia. O dito prazo terá carácter

improrrogable.

A adhesión dos concellos ou mancomunidades autorizarase mediante decreto da Presidencia, no que se concederá a subvención correspondente ata un máximo de 4.500,00 euros. A resolución de autorización de adhesión deberá ditarse antes do 19 de marzo de 2022. Na dita resolución, ou ben noutra resolución posterior, concretaranse as obrigas de limpeza da rede viaria provincial ás que queda condicionada a concesión da subvención, conforme co previsto na base 7ª.

No suposto en que o número de solicitudes exceda das disponibilidades orzamentarias, a Presidencia concederá as subvencións por rigorosa orde de entrada no rexistro da Deputación. Para estes efectos, tomarase a data de entrada no Rexistro Xeral da Deputación da documentación íntegra de cada solicitude, e non se terá en conta a data de presentación de solicitudes incursas en deficiencias formais.

No caso de producirse remanentes con anterioridade ao 23 de abril de 2022 pola renuncia ou perda do dereito ás subvencións por parte dalgún beneficiario, a Presidencia, sen necesidade de proceder a unha nova convocatoria, poderá acordar a concesión da subvención que proceda ao seguinte ou seguintes solicitantes, por orde de entrada no rexistro da Deputación, tal e como se establece no parágrafo anterior.

Sexta.- Publicidade das adhesións e da concesión de subvencións:

A resolución de autorización das adhesións e de concesión das subvencións será obxecto de publicación no Boletín Oficial da Provincia, con expresión dos beneficiarios e contía das axudas concedidas. Esta publicación substituirá á notificación individual para todos os efectos, ao abeiro do establecido no artigo 45.1.b) da Lei 39/2015, de 1 de outubro.

Sétima.- Obrigas dos beneficiarios:

Con carácter xeral, os beneficiarios asumirán todas as obrigas impostas por estas bases e pola Lei xeral de subvencións, en todo aquilo que non resulte incompatible coas bases do Programa. En particular, quedan suxeitos ás obrigas de control financeiro e reintegro nos casos previstos na dita lei.

Con carácter especial, os concellos e mancomunidades adheridos a este Programa de cooperación quedan suxeitos ás obrigas seguintes:

a) Prestar efectivamente o servizo de limpeza da rede viaria municipal e provincial durante o período de tempo mínimo establecido na base segunda, dispoñendo durante ese período, cando menos, dunha máquina con condutor dedicada a estas tarefas.

b) Realizar especificamente os traballos de limpeza da rede viaria provincial, nos períodos de tempo e nas estradas que se especifiquen na resolución de concesión da subvención ou nunha resolución posterior da Presidencia. A determinación dos ditos traballos realizaraa a Deputación conforme coas seguintes regras xerais:

- Cada concello ou mancomunidade beneficiaria estará obrigada a limpar, unha vez ao ano, un tramo ou conxunto de tramos da rede viaria provincial de entre 10 e 12 quilómetros de lonxitude, nun período de tempo que se indicará na resolución de concesión. Os tramos obxecto de limpeza situaranse, preferentemente, no territorio da entidade local beneficiaria, pero poderán situarse en territorio de entidades locais próximas dentro da mesma comarca, tendo en conta as necesidades de mantemento da rede viaria provincial. Excepcionalmente, a petición do concello interesado, a Presidencia poderá reducir o número de quilómetros que é obrigatorio limpar nos supostos en que, ao situarse o tramo obxecto de limpeza en todo ou parte fóra do termo municipal, o cumprimento da dita obrigaón supoña un sobrecusto excesivo para a entidade beneficiaria.

- A limpeza será de bermas, paseos, foxos e noiros, nunha banda de catro metros en cada marxe, deixando unha altura máxima de vexetación tras a roza duns 5-7 cm. Non obstante o anterior, o ancho da banda de limpeza entenderase reducido na medida necesaria cando polas características do terreo resulte materialmente imposible realizar a limpeza en toda a súa extensión.

- Cada concello ou mancomunidade beneficiaria deberá comunicarlle ao Servizo de Vías e Obras, cunha antelación mínima de 5 días naturais, a data concreta do inicio da limpeza, dentro do prazo establecido na resolución de concesión, mediante comunicación que se presentará no Rexistro Electrónico Xeral da Deputación.

- Os técnicos do Servizo de Vías e Obras comunicaranlles ás entidades locais beneficiarias, coa antelación suficiente e mediante notificación con acuse de recibo, a data e hora nas que realizarán as preceptivas comprobacións da limpeza das vías provinciais que se establezan na correspondente resolución da Presidencia. No acto de comprobación poderá estar presente un representante do concello ou mancomunidade beneficiaria. A inspección realizada recollerase na oportuna acta, á que se acompañará unha reportaxe fotográfica, e na que se consignarán as observacións que poida formular o representante da entidade local beneficiaria.

Oitava.- Xustificación e pago da subvención:

1. A subvención xustificárase mediante a presentación dos seguintes documentos:

A.- Certificado expedido pola persoa que teña ao seu cargo o desempeño das funcións de intervención do concello ou mancomunidade beneficiaria, no que se fagan constar os seguintes extremos:

a) Que o servizo de limpeza viaria se prestou efectivamente nun período mínimo de tres meses do ano 2022 e ademais e en todo caso nas datas nas que a Deputación estableceu a limpeza obrigatoria dun número mínimo de quilómetros da rede viaria provincial.

b) Se o servizo se prestou por xestión directa, indicárase a identidade do empregado ou empregados públicos designados para a prestación do servizo e o seu réxime de vinculación xurídica coa entidade local.

c) Se o servizo se prestou por xestión indirecta, indicárase o contrato administrativo a través do que se prestou, sinalando a súa data de adxudicación, importe e empresa adxudicataria.

d) Relación dos custos directos subvencionables de prestación do servizo soportados pola entidade beneficiaria, indicando o seu importe.

e) Relación das subvencións concedidas á entidade local beneficiaria para a mesma finalidade, indicando o seu importe e os conceptos subvencionados.

B.- Certificación do número de conta expedida pola entidade financeira correspondente.

2. As entidades beneficiarias deberán xustificar a subvención ante a Deputación, antes de que remate o día 30 de novembro de 2022. Este prazo terá carácter improrrogable, agás causas de forza maior debidamente acreditadas. En todo caso, a prórroga deberá solicitarse expresamente antes de que remate o día 30 de novembro de 2022 e poderá concederse, como máximo, ata o día 10 de decembro de 2022.

No suposto en que non se presente a documentación xustificativa en prazo, non se formulará ningún tipo de requirimento ao respecto, e procederase directamente á declaración da perda do dereito ou reintegro da subvención, logo da audiencia previa da entidade interesada.

3. Unha vez presentada a documentación xustificativa, emitírase un informe polo Servizo de Investimentos, Contratación e Patrimonio, en relación coa corrección da documentación presentada, e polo Servizo de Vías e Obras, no que se determinará se a realización da limpeza das vías provinciais se desenvolveu nas condicións establecidas por

resolución da Presidencia.

En caso de que o informe do Servizo de Investimentos e Patrimonio sexa desfavorable, requiriráselle á entidade solicitante a emenda da documentación presentada, por prazo de dez días hábiles. Neste mesmo prazo, a entidade local poderá formular as alegacións que estime oportunas ao respecto, se considerase que a documentación achegada é correcta.

No caso de que o informe do Servizo de Vías e Obras sexa desfavorable, daráselle traslado deste informe á entidade beneficiaria, que disporá igualmente dun prazo de dez días hábiles para a formulación de alegacións.

Os trámites anteditos refundiranse nun único trámite de audiencia e requirimento de emenda de deficiencias, no caso de que os dous informes sexan desfavorables.

4. Concluída a instrución da peza de xustificación, o Servizo de Investimentos, Contratación e Patrimonio (previo o informe do Servizo de Vías e Obras respecto das alegacións respecto da limpeza efectuada nas vías provinciais) formulará proposta de resolución á Presidencia.

A dia proposta será sometida a fiscalización previa pola Intervención, conforme co previsto nos artigos 214 a 218 do Texto refundido da Lei reguladora das facendas locais.

A Presidencia resolverá, segundo proceda, nalgún dos sentidos seguintes:

a) Declarar totalmente xustificada a subvención, ordenando o seu pagamento ao beneficiario, cando a xustificación se presente correctamente e o informe de Vías e Obras sexa favorable.

b) Declarar parcialmente xustificada a subvención, ordenando o pagamento do importe correspondente, e a simultánea declaración de perda parcial do dereito á subvención (ou do reintegro dos pagos anticipados, de ser o caso) nos supostos en que o gasto xustificado sexa inferior á subvención concedida ou cando conste a existencia doutras axudas ou subvencións, públicas ou privadas que, sumadas á subvención provincial, excedan en conxunto do gasto xustificado.

c) Declarar a perda total da subvención (e a obriga de reintegro dos pagos anticipados, de ser o caso) nos casos en que o informe do Servizo de Vías e Obras sexa desfavorable, así como nos casos de ausencia de xustificación ou cando da xustificación presentada se desprenda o incumprimento das condicións establecidas no presente Programa. Excepcionalmente, nos supostos en que do informe desfavorable do Servizo de Vías e Obras se desprenda que o incumprimento da obriga de limpeza das marxes da rede

viaria provincial ten un carácter leve, a Presidencia poderá declarar unicamente a perda ou reintegro parcial da subvención, reducindo esta na porcentaxe que se considere axeitada en aplicación do principio de proporcionalidade.

5. Sen prexuízo do anterior, poderá realizarse o pago anticipado do 50 % do total estimado da subvención en calquera momento posterior á adhesión ao Programa de cooperación, trala solicitude previa da entidade local beneficiaria. O pagamento anticipado suxeitarase aos requisitos establecidos no artigo 16 da Ordenanza xeral de subvencións da Deputación Provincial (BOP n.º 260, do 12 de novembro de 2015).

6. Nos supostos en que da acta á que se refire o derradeiro parágrafo da base 7ª se desprenda un incumprimento de carácter substancial e non emendable por parte do beneficiario, a Deputación, sen necesidade de agardar á presentación da xustificación, iniciará o expediente de declaración de perda total ou reintegro da subvención, no que se lle dará audiencia ao interesado.

En caso de que o incumprimento advertido teña carácter leve ou sexa emendable, a entidade local beneficiaria disporá dun prazo de sete días naturais para emendar as deficiencias advertidas. Transcorrido o dito prazo, o Servizo de Vías e Obras xirará nova visita de inspección, da que se levantará acta co mesmo contido que na primeira visita. De persistir as deficiencias, a Deputación procederá á apertura do expediente de declaración de perda ou reintegro da subvención, que poderá ter carácter parcial en caso de incumprimentos leves. A declaración de perda parcial non eximirá á entidade local beneficiaria da obriga de presentar a xustificación prevista no apartado 1 desta base con respecto á parte de subvención subsistente.

7. A Intervención da Deputación poderá realizar funcións de inspección e control financeiro das entidades beneficiarias, de conformidade co establecido na Lei xeral de subvencións. Cando do informe de control financeiro se deduza a existencia de irregularidade na xustificación, a Deputación incoará o expediente de reintegro que proceda, que se tramitará conforme ao previsto na Lei xeral de subvencións e á súa normativa de desenvolvemento.

Novena.- Compatibilidade con outras axudas ou subvencións públicas:

Estas axudas son compatibles con outras axudas ou subvencións, concedidas por administracións distintas da propia Deputación de Ourense ou do seu organismo autónomo, o INORDE, para a mesma finalidade, sempre que o conxunto das axudas percibidas non

exceda do 100 % do gasto corrente directo do servizo subvencionado soportado pola entidade local no período mínimo recollido na cláusula primeira. No suposto de que as subvencións percibidas excedan a dita porcentaxe, a subvención reducirase ata acadar o límite sinalado. A redución poderá acordarse, de oficio ou a instancia do beneficiario, en calquera momento no que a Deputación teña coñecemento da concorrência de axudas, e mesmo con posterioridade ao pagamento da subvención, mentres non prescriba a acción administrativa de reintegro.

Estas subvencións son incompatibles con calquera outra concedida pola Deputación Provincial de Ourense ou polo INORDE para a mesma finalidade, con independencia da súa contía e procedemento de concesión.

Décima.- Normativa aplicable:

De conformidade co establecido na Disposición Adicional 8ª da Lei xeral de subvencións, as subvencións incluídas neste programa de cooperación réxense polas súas normas específicas. A Lei xeral de subvencións e as súas normas complementarias e de desenvolvemento serán de aplicación supletoria, agás naqueles casos en que as presentes bases remitan ás ditas normas, en que serán de aplicación directa.

En todo caso, será de aplicación a lexislación vixente en materia de réxime xurídico das administracións públicas e procedemento administrativo común.

ANEXO I

MODELO DE RESOLUCIÓN DE ADHESIÓN AO PROGRAMA DE COOPERACIÓN

Unha vez vistas as bases reguladoras do Programa provincial de cooperación cos concellos para realización de actuacións de limpeza das marxes das redes viarias municipal e provincial para o exercicio 2022, e no uso das atribucións que me confire o ordenamento xurídico, dispoño:

1º) Aprobar a adhesión do Concello / da Mancomunidade de _____ ao Programa provincial de cooperación cos concellos para realización de actuacións de limpeza das marxes das redes viarias municipal e provincial para o exercicio 2022, solicitando a concesión dunha subvención por importe de 4.500 euros (no caso de solicitar un importe inferior, indíquese expresamente neste apartado a cifra solicitada).

2º) Asumir expresamente as obrigas que como beneficiario lle corresponden no programa de cooperación, en particular as previstas na cláusula 7ª das bases que regulan o programa de cooperación, comprometéndose a realizar os traballos da rede viaria provincial que se determinen por resolución da Presidencia da Deputación, para un tramo ou conxunto de tramos de entre 10 e 12 quilómetros de lonxitude.

3º) Declarar que o Concello/ a Mancomunidade de _____ non se

atopa incurso en prohibición de obter subvencións da Deputación Provincial conforme co que dispón o artigo 13 da Lei xeral de subvencións, manifestando, igualmente, estar ao corrente das obrigas tributarias e de Seguridade Social.

Ourense, ____ de _____ de 202__

Asdo.: _____

SR. PRESIDENTE DA DEPUTACIÓN PROVINCIAL DE OURENSE

ANEXO II

DECLARACIÓN AXUDAS

Don/Dona _____, alcalde/sa do
Concello/presidente Mancomunidade de _____, con CIF _____,

DECLARA

☐ Non ter solicitada, nin en consecuencia, ter concedida, ningunha axuda para a mesma finalidade, sexa pública ou privada.

☐ Que presentou a/as solicitude/s e que lle foi/foron concedida/s, se é o caso, a/s seguinte/s axuda/s para a mesma finalidade:

Organismo ou entidade ao que solicita	Data solicitude	Concesión*	Contía

*No caso de estar pendente a resolución dalgunha solicitude, indicárase “pendente” na columna.

No caso de solicitudes denegadas, farase constar “denegada”.

Ourense, ____ de _____ de 202__

Asdo.: _____

2º.- Someter a trámite de información pública, mediante anuncio publicado no Boletín Oficial da Provincia de Ourense e na sede electrónica da Deputación, as bases inicialmente aprobadas polo prazo de 10 días hábiles, durante os cales as entidades interesadas poderán formular as alegacións ou suxestións que consideren oportunas, que deberán ser resoltas motivadamente no acto de aprobación definitiva.

No caso de non formularse alegacións en prazo, entenderanse automaticamente aprobadas de forma definitiva, procedendo á súa publicación no Boletín Oficial da Provincia.

7º.- MOCIÓN DO GRUPO SOCIALISTA SOBRE O PARQUE EMPRESARIAL DE TABOADELA.-

D. Aurentino Alonso Araújo do Grupo Socialista, expón o contido da moción.

D.^a Montserrat Lama Nóvoa e don José Miguel Caride Domínguez, deputados non adscritos, manifesta que reservan o voto para o Pleno.

D. Bernardo Varela López, do BNG, indica que se absterá nesta proposta, xa que o seu grupo non é partidario de que sexa a Deputación Provincial a que asuma competencias propias da Xunta de Galicia, xa que de asumirse pola Deputación a totalidade dos metros cadrados que conforman o denominado parque empresarial de Taboadela estaríamos a resucitar algo parecido a Urbaourense, sociedade que a Deputación leva varios anos intentando liquidar.

Non se producen máis intervencións e co voto favorable do Grupo Socialista (3) e a abstención do Grupo Popular (5), de DO (1) do BNG (1) e da/o deputada/o non adscritos (2) a comisión ditamina favorablemente a adopción, por parte do Pleno, do seguinte acordo:

- Solicitarlles ao Instituto Galego de Vivenda e Solo (IGVS) e á Xunta de Galicia a transferencia á Deputación Provincial de Ourense dos terreos que conformarían o denominado “Parque Empresarial de Taboadela”, para desenvolver proxectos estratéxicos para a provincia de Ourense.

8º.- MOCIÓN DE URXENCIA.- O presidente da comisión xustifica a urxencia deste asunto na proposta realizada pola Área de Infraestruturas, para executar antes de final de ano os remanentes obtidos en todas as obras licitadas no plan provincial.

A urxencia do asunto é aprobada por unanimidade, procedéndose ao seu tratamento.

8ª.- MODIFICACIÓN DO PLAN PROVINCIAL DE COOPERACIÓN ÁS OBRAS E SERVIZOS MUNICIPAIS E DA REDE VIARIA PROVINCIAL DO EXERCICIO 2021, RELATIVA Á INCORPORACIÓN DE OBRAS NO PLAN PRINCIPAL DA REDE VIARIA PROVINCIAL.

O Sr. secretario explica o contido da proposta.

D. Aurentino Alonso Araújo, do Grupo Socialista, sinala que seguramente todas as obras que se propoñen necesitan das ditas actuacións, se ben gustaríalle deixar constancia de que non existe ningunha obra na zona oriental da provincia de Ourense. Insiste en que é necesario realizar unha planificación a medio e a longo prazo para o mantemento da rede viaria provincial.

Non se producen máis intervencións e co voto favorable do Grupo Popular (5), de DO (1) e da/o deputada/o non adscritos (2) e a abstención do Grupo Socialista (3) e do BNG (1), a comisión ditamina favorablemente a adopción, por parte do Pleno, do seguinte acordo:

1º.- Aprobar inicialmente a modificación do Plan provincial de cooperación ás obras e servizos municipais e da rede viaria provincial do exercicio 2021, consistente na incorporación das seguintes obras ao plan principal da rede viaria provincial de 2021, con cargo a remanentes, obtidos por baixas na adxudicación de obras:

- a) “Reforzo de firme na *OU-0568 Rúa Quintián - Alejandro Pedrosa (OU-0526), pq 0+120 e 1+080*”, no termo municipal de Ourense, cun investimento de 95.508,72 €, co número 126/POS/2021.
- b) “Instalación de barreiras de seguridade na *OU-0605 Pedra do Sol (OU-0606) - Parada de Sil (OU-604), pq 3+000 e 4+183*”, no termo municipal da Teixeira, cun investimento de 48.201,58 €, co número 127/POS/2021.
- c) “Sinalización de vías preferentes para ciclistas e substitución de fitos quilométricos na zona oeste”, nos termos municipais de Pereiro de Aguiar, Nogueira de Ramuín, Maceda, Baños de Molgas e Vilar de Barrio, cun investimento de 44.838,57 €, co número 128/POS/2021.
- d) “Limpeza de foxos nas estradas *OU-0515 Pereiras (OU-0102) a Taboadela (OU-320)*,”

pq 0+400 a 4+000 e *OU-0603 Vilariño Frío (OU-536) - Montederramo (OU-0602) pq0+150 a 10+050*”, nos termos municipais de Taboadela e Montederramo, cun investimento de 47.951,91 €, co número 129/POS/2021.

e) “Aplicación de microaglomerado na *OU-1108 Baltar (OU-304) - Cualedro (OU-1020)*, pq 0+000 a 1+780, pq 11+200 a 11+400 e p.q.19+000 a 19+300”, no termo municipal de Baltar, cun investimento de 48.161,47 €, co número 130/POS/2021.

f) “Formigonado de foxos tipo “VER” na OU-1212 e na OU-1202”, termos municipais de Lobios, Entrimo e Muíños, cun investimento de 47.332,39 €, co número 131/POS/2021.

g) “Realización de obras de drenaxe na *OU-1104 Vila de Rei (N-525) - Vilar de Barrio, pq 2+900 a 3+100*”, termo municipal de Trasmiras, cun investimento de 9.791,31 €, co número 132/POS/2021.

2º.- Someter a dita aprobación ao trámite de información pública, mediante a inserción de anuncio no Boletín Oficial da Provincia de Ourense, polo prazo de dez (10) días hábiles, durante os cales as entidades interesadas poderán formular as alegacións ou suxestións que consideren oportunas, que deberán ser resoltas motivadamente no acto de aprobación definitiva.

No caso de non formularse alegacións en prazo, entenderase automaticamente aprobada de forma definitiva, procedendo á súa publicación no Boletín Oficial da Provincia.

9º.- ROGOS E PREGUNTAS.- Nesta quenda prodúcense as seguintes intervencións:

O presidente da comisión toma a palabra para responder a unha pregunta formulada tanto na comisión como no pleno por dona Rosario Rodríguez Delgado, na que se instaba a mellorar a sinalización da estrada provincial OU-0564 Toén-Mugares. Sinala que desde a Área de Infraestruturas se lle informou que no ano 2020 a media de tráfico de vehículos pesados polo dito tramo é de 3 ao día, fronte aos 22 ao día do ano 2019 e anteriores. Esta circunstancia ben motivada polo peche dunha canteira que se localizaba no entorno da dita estrada, polo que desde a Área de Infraestruturas se considera que non é preciso realizar actuacións de sinalización no dito tramo, que ademais presenta un índice de sinistralidade baixo nos últimos anos.

E ás 18.40 horas dáse por finalizada a reunión, redactándose a presente acta que se asinará electronicamente. Dou fe.